

ACORDO DE COLABORACIÓN ENTRE A FUNDACIÓN CIDADE DA CULTURA DE GALICIA E A AXENCIA GALEGA DAS INDUSTRIAS CULTURAIS PARA O DESENVOLVEMENTO DO CICLO MUSICAL "ATARDECER NO GAIÁS" NO EXERCICIO 2025.

En Santiago de Compostela, na data da sinatura dixital.

REUNIDOS

Dunha parte, dona Ana Isabel Vázquez Reboredo, en calidade de directora-xerente da Fundación Cidade da Cultura de Galicia, con domicilio social no Gaiás - Cidade da Cultura de Galicia, con NIF G15721640, cargo para o que foi nomeada o día 16 de decembro de 2016, actuando no exercicio do seu cargo en función das atribucións que lle confire o Padroado da dita Fundación, acordo elevado a escritura pública en data de 19 de decembro de 2016, ante o Notario do Ilustre Colexio de Galicia D. Héctor R. Pardo García, co núm. do seu protocolo 1.689.

Doutra parte Jacobo Sutil Nesta, na súa calidade de director da Axencia Galega das Industrias Culturais (no sucesivo Agadic), con NIF Q-6550009-B e enderezo na Cidade da Cultura de Galicia, Monte Gaiás s/n, Santiago de Compostela, no exercicio das facultades e demais funcións que lle foron conferidas por razón do seu cargo pola Lei 4/2008, do 23 de maio, de creación da Axencia Galega das Industrias Culturais e o Decreto 150/2012, de 12 de xullo, polo que se aproba o Estatuto da Axencia Galega das Industrias Culturais (por delegación, en virtude da resolución do 24 de xullo de 2012, do presidente do Consello Reitor da Agadic de delegación de competencias na persoa titular da Dirección da Agadic, publicada no Diario Oficial de Galicia o 29 de agosto de 2012).

EXPOÑEN

Primeiro.- A Axencia Galega das Industrias Culturais, creada pola Lei 4/2008, do 23 de maio, de creación da Axencia Galega das Industrias Culturais, é unha axencia pública con personalidade xurídica propia, patrimonio propio e autonomía na súa xestión, segundo establece o artigo 1.2 da citada Lei.

O obxecto da Axencia é, entre outros, o fomento da oferta de bens e servizos culturais, fixado polo artigo 3.1 da Lei, e entre as súas funcións atribúense a de favorecer os produtos que difundan a lingua, a cultura e as tradicións propias de Galicia, (artigo 5.b), da Lei 4/2008). Para o logro dos seus obxectivos, a Agadic poderá subscribir convenios, realizar actividades comerciais e industriais, conceder subvencións e establecer calquera outra iniciativa de acción tendente á consecución dos obxectivos que se lle atribúen (artigo 5.2 da Lei 4/2008).

Segundo.- Que a Fundación Cidade da Cultura de Galicia (en diante, Fundación) foi constituída como "organización de natureza fundacional, de interese galego, sen ánimo de lucro, cun patrimonio afecto de maneira duradeira á realización dos fins de interese xeral propios da Institución". Mediante a Orde da Consellería da Presidencia, Relacións Institucionais e Administración Pública do 11 de xaneiro de 2000 (DOG núm. 11 do 18 de xaneiro), clasificouse a fundación como cultural e adscribiuse á Consellería de Cultura. Por Orde da Consellería de



Cultura do 19 de xaneiro do 2000 (DOG núm. 26 do 8 de febreiro) declarouse de interese galego e inscribiuse no rexistro de fundacións desta consellería co número 73.

A Fundación ostenta a titularidade da "Cidade da Cultura de Galicia" (CdC), un innovador e vangardista complexo construtivo, de singular valor arquitectónico. Segundo o artigo 6 dos estatutos constitúe o seu obxecto social *"a creación, explotación e promoción de áreas ou centros de conservación, produción, exhibición e consumo cultural, comunicativo e tecnolóxico, que constitúa un espazo multifuncional, multidisciplinar e aglutinador, propicio á interacción cultural"*.

Para a consecución dos fins mencionados no parágrafo anterior, a fundación pode realizar, entre outras, as seguintes actividades:

[...] b) *As que contribúan a desempeñar un papel destacado no proceso de enriquecemento/aprendizaxe cultural da cidadanía, con especial énfase na adopción e uso das novas tecnoloxías.[...]*

e) *As que fomenten a interrelación e os proxectos en conxunto entre axentes de distintos ámbitos das industrias culturais e creativas, con especial énfase na cooperación interrexional e a colaboración pública e privada.[...]*

[...] g) *As que impulsen o Emprendemento empresarial no ámbito das industrias culturais e creativas, con especial énfase en proxectos que favorezan a innovación, tanto tecnolóxica como non tecnolóxica, e a súa transferencia aos sectores máis maduros do tecido produtivo, servindo como plataforma de desenvolvemento e promoción da marca país Galicia.*

h) *As actividades e accións que contribúan a converter á Cidade da Cultura de Galicia nun proxecto economicamente sostible e socialmente rendible, incorporando novos socios estratéxicos, tanto públicos como privados, e diversificando as fontes de financiamento para acadar a sustentabilidade do proxecto con independencia do ciclo económico.*

Terceiro.- Que a Fundación promove a realización de actividades de moi diversa índole, nas que o eixo común sexa o de contribuír ao fomento da cultura galega, o crecemento económico e á creación de emprego na nosa comunidade, actuando como elementos vehiculares na transmisión da identidade cultural, aspecto este esencial na difusión e promoción da diversidade cultural.

Neste, senso, a Fundación organiza, entre outras, no 2025, o ciclo musical "Atardecer no Gaiás", que desenvolverase entre o día 3 de xullo e o 14 de agosto.

Atardecer non Gaiás celebra este 2025 os seus 15 anos de concertos cunha máxima que segue vixente desde o principio: reunir nun mesmo espazo interesantes propostas musicais cuns atardeceres únicos na cidade de Compostela. O ciclo logrou, ao longo destes anos, xerar un ambiente moi especial, no que o seu fiel público achégase ao monte Gaiás principalmente para descubrir novas propostas musicais, normalmente cun carácter que oscila entre o íntimo e o festivo, conceptos que se bañan coa luz do atardecer e as ganas de refrescarse, nese momento no que diminúe a intensidade das temperaturas estivais.

Como novidade da edición deste 2025, preséntase un día dedicado á música urbana que contará con varias bandas para captar novos públicos e terá formato de festival.

Ademais, co fin de fortalecer a programación e atendendo á pouca luz e a temperatura pouco agradable que adoita haber nas últimas semanas de agosto, que desvirtúan a idea do ciclo de



gozar dun atardecer mentres se escoita música, propónse reducir o número de semanas do ciclo, comezando cun gran concerto o xoves 3 de xullo e terminando o 14 de agosto.

A nivel musical, trátase dunha cita que ten o eclecticismo como bandeira, reunindo nun mesmo programa estilos moi diversos, con propostas que van desde o indie á electro cumbia, da electrónica á música de raíz, sempre con espazo para sons máis clásicos como o rock, o pop ou o funk.

En canto ao estilo, o programa de 2025 está a configurarse en base a estas liñas estratéxicas:

- Manter a presenza de bandas galegas e nacionais consolidadas.
- Impulsar a bandas noveis que teñen os seus primeiros traballos no mercado.
- Dar espazo a novas músicas que fusionan a música de raíz con sons innovadores.
- Reforzar o vínculo internacional con propostas estranxeiras.
- Ampliar a presenza de grupos de música urbana para captar novos públicos.

Aínda pendentes de formalizar a contratación con determinadas compañías/axentes e grupos, compre salientar (por referencia aos dous últimos anos), a aposta no ciclo pola escena musical galega.

Por outra banda, a produción técnica (son e iluminación), e o subministro de estruturas e loxística relacionada coa organización do ciclo musical, recaerá en empresas galegas, atendendo aos lotes adjudicados no expediente de contratación CDC-2024-0008.

O orzamento total previsto para o festival, ronda os 85.000,00 €, sen incorporar os custos de comunicación e os indirectos relacionados coa seguridade, limpeza e mantemento. Porén, os fondos propios cos que conta a Fundación Cidade da Cultura de Galicia alcanzan unha cifra de 45.000,00 € para a amentada actividade.

Cuarto.-A Lei 14/2013, do 26 de decembro, de racionalización do sector público autonómico sinala no seu artigo 14 que a Administración xeral da Comunidade Autónoma e as entidades do sector público ou estas entre elas, poderán formalizar acordos de colaboración ou cooperación para o servizo aos intereses xerais mediante o desempeño conxunto de tarefas de interese público da súa competencia.

A colaboración ou cooperación consistirá na participación conxunta e efectiva no desenvolvemento da actividade común, mediante achegas de traballos de organización, medios persoais e materiais ou recursos financeiros para a finalidade compartida, de acordo coas respectivas competencias, e será sempre diferente das estruturas contractuais onerosas reguladas na lexislación de contratos do sector público.

Sinala ademais que a colaboración ou cooperación será compatible coa compensación dos custos reais en que unha das partes incorrese.

Tendo en conta o anterior, a Agadic e a Fundación, manifestan a súa vontade de colaboración no desenvolvemento destas actividades, e a tal fin acordan a sinatura do presente acordo con suxeición ás seguintes



CLÁUSULAS

1ª- Obxecto

O obxecto do presente acordo é establecer as pautas que se seguirán na colaboración entre a Agadic e a Fundación, para o desenvolvemento do ciclo musical "Atardecer no Gaiás", promovido pola Fundación para o exercicio 2025.

2ª- Financiamento das actividades.

Agadic comprométese a financiar a actividade cun importe de **CORENTA MIL EUROS (40.000,00 €)**. Esta achega será obxecto de retención de crédito, para a súa posterior baixa na aplicación orzamentaria 13 A1 432B 6401 do código de proxecto 2013 00005 dos orzamentos da Agadic para o ano 2025.

Este importe será ampliado no orzamento da Fundación Cidade da Cultura de Galicia, previa a correspondente modificación das transferencias de financiamento da Agadic a favor da Fundación Cidade da Cultura de Galicia no ano 2025.

Os contas destinatarias da Fundación, dos fondos a transferir, son:

Ciclo Musical "Atardecer no Gaiás":

21900000: Outro inmovilizado material: **40.000,00 €**

3ª- Previsións de desenvolvemento

A colaboración derivada desde acordo poderá ser obxecto do desenvolvemento ulterior e concreción que sexa preciso, a través dos instrumentos ou das actuacións que se estimen necesarias para súa consecución de conformidade coa normativa vixente.

4ª- Modificación, denuncia e resolución do acordo

As partes poderán modificar ou resolver o presente acordo en calquera momento por mutuo acordo. Así mesmo, poderán denunciar o presente acordo en calquera momento, por vontade expresa de calquera das partes cun preaviso de dez días naturais.

O incumprimento de calquera das obrigas contraídas no presente acordo por unha das partes facultará ás outras para resolver o mesmo, cos efectos que legalmente procedan.

5ª- Comisión de seguimento

Para o desenvolvemento e bo fin deste acordo de colaboración constituirase unha comisión paritaria que velará polo cumprimento das obrigas das partes e adoptará cantas medidas e especificacións técnicas sexan precisas de cara a garantir a boa execución do acordo. A súa actuación axustarase ao establecido na Lei 40/2015, do 1 de outubro, de réxime xurídico do



sector público e na Lei 16/2010, de 17 decembro, de organización e funcionamento da administración xeral e do sector público autonómico de Galicia.

A Comisión de Seguimento do presente acordo estará integrada por un mínimo de dous representantes por cada unha das partes asinantes deste convenio. Os membros desta comisión poderán ser substituídos polas persoas que estes designen. Esta comisión estará presidida por un dos representantes da Agadic.

6ª- Protección de datos

1. Tratamento de datos persoais das partes intervenientes no acordo:

As partes intervenientes manifestan ter sido informadas, respecto dos seus propios datos persoais que se faciliten para a formalización e o adecuado desenvolvemento deste convenio, conforme ao disposto no artigo 13 do Regulamento 2016/679 (UE) xeral de protección de datos persoais (en diante, RXPD). A lexitimación para o tratamento dos datos seus datos, será a execución do presente convenio.

No caso de que, no ámbito deste acordo, os intervenientes se facilitasen respectivamente datos persoais de terceiros, incluídos os relativos ao persoal ao seu servizo, estes serán tratados para o cumprimento dunha misión de interese público ou o exercicio de poderes públicos, debendo informar previamente á súa comunicación aos interesados dos extremos previstos no devandito artigo 13.

2. Deber de confidencialidade das partes intervenientes no convenio

As partes intervenientes deberán respectar o segredo profesional e, en consecuencia, manter absoluta confidencialidade e reserva sobre a totalidade dos documentos e informacións que lle foran confiados para a formalización do convenio ou que sexan elaborados con ocasión da execución do mesmo. Así, quedan expresamente obrigadas:

- a utilizar a devandita información exclusivamente no ámbito deste convenio e para as finalidades previstas no mesmo;
- a non comunicala, nin total nin parcialmente, a ningún terceiro sen autorización expresa do emisor salvo nos casos expresamente previstos na lei, esixindo idéntico compromiso ao persoal que empregue ou co que colabore na execución do convenio;
- a facilitar o acceso á información unicamente ao persoal que a necesite para o desenvolvemento da devandita relación, a quen se comunicará a obrigaçión de tratar a información á que se lles dá acceso con carácter estritamente confidencial;
- a aplicar medidas de cautela e protección e destruír en calquera momento a documentación escrita recibida se así o solicita a parte que a forneceu;

Considerarase información confidencial aquela á que os intervenientes accedan en virtude do presente acordo, especialmente a de tipo técnico ou tecnolóxico, de produción, de mercadotecnia, administrativa, ou económico-financeira, sempre que non teña carácter público ou notorio. Este deber manterase durante un prazo mínimo de dez anos desde o coñecemento desa información.



7ª- Réxime xurídico e resolución de conflitos

Este acordo de colaboración ten natureza administrativa, e rexerese pola Lei 39/2015, do 1 de outubro, do procedemento administrativo común das Administracións públicas, pola Lei 40/2015, do 1 de outubro, de réxime xurídico do sector público, pola lexislación en materia de contratos do sector público e polas demais normas de dereito administrativo e, no seu defecto, polas normas de dereito privado.

As cuestións litixiosas xurdidas na aplicación do presente acordo, e non solucionadas na vía administrativa, serán resoltas pola xurisdición contencioso-administrativa.

8ª- Vixencia

Este acordo producirá os seus efectos a partir da data da súa sinatura, e a súa vixencia estenderase ata o momento que cese o desenvolvemento nel previsto e, en todo caso, antes da finalización do actual exercicio económico.

9ª- Publicidade

Este acordo será obxecto de inscrición en cumprimento do establecido no artigo 15 da Lei 1/2016, do 18 de xaneiro, de transparencia e bo goberno e no Decreto 126/2006, do 20 de xullo, polo que se regula o Rexistro de Convenios da Xunta de Galicia.

As partes asinantes autorizan/consenten na publicidade dos seus datos persoais e demais especificacións recollidas no presente acordo de colaboración no Portal de Transparencia e Goberno Aberto.

Segundo o artigo 17 da Lei 1/2016, do 18 de xaneiro, ademais da información que debe facerse pública segundo a normativa básica en materia de transparencia, a Administración autonómica publicará o texto íntegro do acordo.

E en proba de conformidade co exposto, asinan este acordo no lugar e data sinalados.

Pola Fundación Cidade da Cultura

**Pola Axencia Galega das Industrias
Culturais**

Ana Isabel Vázquez Reboredo Directora-Xerente	Jacobo Sutil Nesta Director
--	--

